

KHUTBA JUMMAH

HADHRAT MUHYI-UD-DIN AL-KHALIFATULLAH

Munir Ahmad Azim

28 Août 2015 ~

(12 Dhul Qaddah 1436 Hijri)

(Résumé Khutba)

Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hadhrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite axé so Khutba lors:

هَذَا بَصِيرَةٌ لِلنَّاسِ وَهُدًى وَرَحْمَةٌ لِّقَوْمٍ يُوقِنُونَ ﴿٢١﴾ أَمْ حَسِبَ الَّذِينَ اجْتَرَحُوا السَّيِّئَاتِ أَنْ
يَجْعَلَهُمُ كَالَّذِينَ آمَنُوا وَعَمِلُوا الصَّالِحَاتِ سَوَاءً مَحْيَاهُمْ وَمَمَاتُهُمْ سَاءَ مَا يَحْكُمُونَ ﴿٢٢﴾
وَخَلَقَ اللَّهُ السَّمَوَاتِ وَالْأَرْضَ بِالْحَقِّ وَلِتُجْزَىٰ كُلُّ نَفْسٍ بِمَا كَسَبَتْ وَهُمْ لَا يُظْلَمُونَ ﴿٢٣﴾

Haazaa basaaa-iru linnaasi wa hudaww-wa Rahmatul-li-qawmiyy-yuuqinuun. 'Am hasiballazii-najtarahus-sayyi-'aati 'an-naj-'alahum kallaziina 'aamanuu wa 'amilus-saalihaati, sawaaa-'am-mahyaahum wa mamaatuhum ? Saaa-'a maa yah-kumuun. Wa khalaqallaahus-samaawaati-wal-'arza bil haqqi wa litujzaa kullu nafsima-bimaa kasabat wa hum laa yuzlamuun.

« Sa li ene illumination pour dimounes, ene guide et ene grâce pou dimounes avec conviction. Eski bane ki commette de mauvaises actions pensé ki Nous pou traite zot pareil couma bane ki ena la foi et faire de bonnes actions, ki zot la vie et zot la mort pou pareil ? Couma zot juge mal! Allah fine crée bane les ciels et la terre en toute vérité, pou récompense sak l'âme d'après séki li mériter et aucaine injustice pas pou faire zot. » (Surah Al Jathiya 45: 21-23)

Dans premier verset là (Verset 21), Allah pé dire ki sa Quran là et bane paroles de sa Quran là li contenir bane preuves claire pou l'humanité. Si ene dimoune guette sa avec *Taqwa* (la crainte d'Allah, avec piété) et dans n'importe ki l'aspé ki li pou guetter, bé certainement li pou trouve bane preuves bien claire là-dans. Ensuite Allah dire c'est ene guide et ene miséricorde pou bane ki ena la foi, ki ena ene certitude complet là-dans. Dans l'autre verset (Verset 22), Allah dire :

« *Eski bane ki commette de mauvaises actions pensé ki Nous pou traite zot pareil couma bane ki ena la foi et faire de bonnes actions, ki zot la vie et zot la mort pou pareil ?* »

En d'autres mots, eski zot croire ki Nous pou faire même traitement are zot (bane ki faire mauvaises actions) de sorte ki zot la vie et zot la mort aussi vine pareil couma la vie et la mort de bane dimounes ki croire ? Non, li impossible. Pou bane ki amène *Imaan* (la foi) et faire de bonne actions, bé lors sa *duniya* (lémonde ici-bas) là même Allah faire ene tel traitement are zot ki distingue zot de tout bane les autres. Et c'est ene traitement ki pou continué.

Donc, traitement ki Allah réservé pou bane ki fine amène *Imaan*, li tout à fait différent de traitement ki bane dimounes ki plongé dans le mal gagné. Traitement là li différent et li bien distingué et kan ou guette sa traitement là même, ou pou fini conné ki sa c'est bane serviteurs d'Allah et sa lotte bane là c'est bane suivants d'Iblis. Lerlà Allah dire, si zamais zot penser ki Nous pou ena ene même traitement, bé c'est ene très mauvais décision de zot part. C'est ene décision ki prive zot de tout bane succès. Dans sa parole ki Allah servi kot Li dire : « *Couma zot juge mal !* », alors sa mauvais jugement de zot part là, ena encore d'autres sujets ki pé mentionner. Li veut aussi dire ki en résultat de sa jugement là même ki ena boucou désordre ki crée dans le monde de la religion et aussi dans le monde matériel.

Dans le prochain verset (Verset 23) Allah pé dire : « *Allah fine crée bane les ciels et la terre en toute vérité – 'bil Haqqi'* ». Désordre pas capave rester avec vérité. Péna aucaine lien entre zot. Li veut dire ki kan Allah fine crée bane les ciels et la terre avec vérité et kot là-dans péna aucaine manquement, bé couma est-ce possible maintenant ki dans le monde de la religion, Allah faire de sorte ki bane mauvais capave reste ensemble avec bane bons? Sak fois ou tender même sa parole là ki la vérité pas capave reste ensemble avec mensonge et mensonge aussi pas capave reste ensam avec la vérité! Lerlà Allah dire ki sak l'âme pou récompensée justement. Zot pou gagne céki zot bizin gagné et pas pou ena aucaine injustice là-dans. En fait injustice aussi li pas marche ensemble avec la vérité. Et la justice li en fait ene création de vérité même.

Dans sa bane versets là, le Quran fine mentionne bane sujets bien vastes et profond. Donc, pou le *Tarbiyyat* du Jamaat Ul Sahih Al Islam, Jamaat Ahmadiyya et le monde musulman en général, alors, pou comprend sa bane versets ki mo fine lire là, li demande ene éclaircissement bien profond. Comprend moi bien, ki sakaine d'entre zot bizin donne priorité le confort de zot frères lors zot propre confort. Faire ene vrai réconciliation avec Allah et retourne sous l'obéissance d'Allah. La colère d'Allah pé déssane lors la terre, et c'est seulement bane ki faire repentance complet de tout zot péchés et zot présente zot devant Allah, c'est zot seulement ki pou sappé de sa punition d'Allah là.

Donc si ou envie vine bane tel dimounes, bé le premier qualité ki ou bizin ena c'est ki ou bizin donne confort de ou bane frères priorité lors ou propre confort et en d'autre mots ou faire tous sa seulement pou l'amour ki ou ena pou ou Créateur, kot c'est en fait ene vrai réconciliation ki ou fine faire avec Allah. C'est dans sa façon de réconciliation là même ki demander ki ou donne priorité, confort et tranquillité de ou bane frères lors ou propre confort et tranquillités, sans ki ou blesse le cœur de ou bane frères par ou façon ki ou azir avec zot. Et faudé pas aussi ou montré aucaine l'autorité, ni l'arrogance, ni vantardize, ni même avec bane ton dur ki sa capave éloigne zot de ou l'entourage, parski si ou fer coumsa, ou tombe dans sa groupe ki forme partie avec Iblis là.

Donc si ou envie vine bane dimounes obéissant envers ou Créateur, ki ena *Taqwa* et tous céki ou faire c'est pour le plaisir d'Allah, bé ou bizin donne priorité le confort de ou bane frères lors ou propre confort. Maintenant si Allah fine choisir ou, kot li fine mette ou là, Li (Allah) envie ki ou donne confort du monde en entier priorité lors ou propre confort, bé à ce moment là sa zaffaire là, bizin commence avec ou bane frères même, parski sans ki ou donne priorités confort ou bane frères lors ou propre confort, ou pas pou capave continuer sa voyage là. Donc mo fine vine lors ene sujet bien profond. Essaye comprend profondeur de sa bane paroles là pou ki ou capave comprend. Bane dimounes ki fine vine lors sa le monde là avec l'objectif seulement pou la cause d'Allah, ou bizin donne priorité confort du monde en entier lors ou propre confort. Même si ou confort en danger, même si ou rejette ou propre confort pas faire nannié; ou sacrifier ou confort aux profits de confort de tout bane dimounes.

En passant mo raconte ene anecdote kot c'est ene mo disciple fine pose moi sa question là, kan mo ti sorti Madagascar récemment sorti depuis aéroport pou vine dans le Nord (kot mo resté) lors ene sujet exact même ki mo ti pé causer. Li fine pose moi sa question là: « *Si ou, ou ti Khalifatul Massih V et le Khalifatul Massih V Masroor Sahib ti le Khalifatullah, ki ou ti pou faire ?* » Mo fine dire li ki c'est ene très jolie question, parski mo priorité arrive céki arrive, même mo la vie en danger mo ti pou rejette sa confort ki l'homme fine élève moi là, kot confort d'ene élu, d'ene Choisi d'Allah en priorité et surtout après ki li faire so proclamation ki li ene Khalifatullah, ene Calife d'Allah ki fine vini avec le Saint Esprit.

Sa même ki au commencement de mo Khutba Jummah mo pé dire ou ki vérité et mensonge pas reste ensemble. Donc bocou cause *Taqwa*. C'est là ki nous alle conne *Taqwa* d'ene dimoune avec l'arrivée d'ene Choisi d'Allah. D'ailleurs mo fine dire mo bane disciples, pense le *Safar Zikrullah* de l'année 2003, kan à sa l'époque là, mo pas ti guette mo propre confort et pour la cause d'Allah, le grand l'estime ki mo ti ena pou ene dimoune, ki mo ti conne so connaissance dans domaine de la religion, alors devant zot tous mo ti dédié sa faveur divine ki Allah ti donne moi à sa dimoune là, ki tous ti bien choqué, mais toute suite Allah pas fine tarder pou déssane So message devant zot tous ki ti présent et kot sa ti ene message réprimande et dur ki Allah (swt) fine manifester toute suite kot Allah dire : « *C'est toi ki Mo fine choisir, c'est pas personne* »

d'autre. » Céki ti présent, zot témoigner dans ki façon sa message là ti déssane et tous ti gagne bien peur et tracasser et moi-même personnellement mo ti bien abattre, kot toute suite ti faire *Istigfaar* pendant combien l'heure de temps avec bocou de larmes et pleurer devant mo *Rab*. Donc sa li différent kot Allah choisir So serviteur, et kot sa serviteur là à ce moment là pas capave faire ene l'autre prend so place.

Donc, bane stages ki ene dimoune gagner de côté Allah, c'est sa point là même ki le point fondamentale. Quand ene dimoune sacrifier so propre confort et tranquillité et li porte attention lors confort et tranquillité de so bane frères, bé certainement Allah risse ene tel dimoune vers Li et pou sa li pas nécessairement ki après l'apostolat ki zot commence avec tel voyage. Non, tous bane prophètes zot commence ene tel voyage, zot ena ene tel qualité avant même zot l'apostolat. Preuve ki pli claire de sa c'est kan nous guette la vie de nous Aka Harzat Muhammad (saw) avant so l'apostolat. Nous trouver couma li ti pé donne zot priorité lors so propre confort, et à ce moment là Allah fine risse li vers Li. Allah fine augmente encore so stage, parski sa c'est ene qualité ki Allah bien content. Et sans sa qualité là, li impossible ki ou faire reforme du monde. Bane ki privé d'ene tel qualité, bé zot privé de l'apostolat et aussi de suivants de l'apostolat. Alors li nécessaire ki ou comprend sa bane zaffaires là bien. Ou bizin vine bane dimoune ki éloigner et séparer de bane ki plonger dans le mal. Ou bizin vine bane groupes à propos de qui Allah dire ki zot fine amène *Imaan* et faire bane bons actions. Donc si vraiment ou ena *Imaan* lors Allah et lors So bane message, bé ou bizin donne ene l'attention spécial lors confort de ou bane frères lors ou propre confort, ene confort de paix, tranquillité, l'amour pou zot. Non plus mette grand panneau: « **Love For All Hatred For None** » kot ou humilié ou frère de même la foi ki ou, faire mette boycotte lors li, pas faire *salaam*, pas invite li dans n'importe ki fonction et faire so propre famille coupe relation familiale avec li complètement. Eski ou pé faire sa pou la cause d'Allah ou pou la cause de ou Khalifa (Élu par l'homme)?

Si ou faire ene kitchose pou la cause d'Allah, bé ou action c'est ki ou ti pou donne priorité le confort de ou bane frères lors ou propre confort. Donc si le Khalifat-ul-Massih vine de cote d'Allah, pou ene seconde li pas ti pou tolère sa bane kitchose ki so bane dimoune pé faire, pas ti pou sème la haine dans le cœur ; au contraire li ti pou ena vrai l'amour dans le cœur.

Donc, *Insha-Allah* vendredi prochain mo continué mo Khutba Jummah lors le même sujet. Ki Allah donne zot le *Tawfiq* pou comprend le message dans sa Khutba Jummah là et ki zot fer bane tel action ki pou attire le plaisir d'Allah lors zot, et afin ki zot réussi considérer par Allah comme So bane vrais serviteurs et aussi suivants de So Khalifatullah de sa siècle présent là. *Insha-Allah. Ameen.*